

- b) geološka dokumentacija ili dio geološke dokumentacije za koji je izvršena nostrifikacija i izvršena ovjera ne zadovoljava zahtjeve iz ovog zakona (član 23.).

## P. PRIJELAZNE I ZAVRŠNE ODREDBE

### Član 72.

#### (Postupci započeti prije stupanja na snagu ovog zakona)

Upravni postupci započeti prije stupanja na snagu ovog zakona okončat će se prema propisima koji su bili na snazi na dan podnošenja zahtjeva.

### Član 73.

#### (Propisi kantonalnog ministra)

Propisi predviđeni za provođenje ovog zakona iz člana 16. i 21. donijet će se u roku od jedne godine od stupanja na snagu ovog zakona.

### Član 74.

#### (Primjena postojećih propisa)

Do donošenja propisa iz člana 81. Zakona o geološkim istraživanjima Federacije Bosne i Hercegovine („Službene novine Federacije BiH broj: 9/10 i 14 /10) primjenjivat će se slijedeći propisi i to:

- a) Zakon o jedinstvenom načinu utvrđivanja, evidentiranja i prikupljanja podataka o rezervama mineralnih sirovina i podzemnih voda i o bilansu tih rezervi (“Službeni list RBiH”, br. 8/93 i 13/94);
- b) Pravilnik o klasifikaciji i kategorizaciji rezervi pojedinih mineralnih sirovina i vođenju evidencije o njima (“Službeni list SFRJ”, br. 53/79);
- c) Pravilnik o klasifikaciji i kategorizaciji podzemnih voda i njihovoj evidenciji (“Službeni list SFRJ”, br. 34/79);
- d) Pravilnik o klasifikaciji i kategorizaciji rezervi nafte, kondenzata i prirodnih plinova te o vođenju njihove evidencije (“Službeni list SFRJ”, br. 80/87);
- e) Pravilnik o načinu i programu polaganja stručnog ispita radnika geološke struke (“Službeni list RBiH”, br. 16/93 i 13/94);
- f) Pravilnik o sadržini programa, projekata i elaborata geoloških istraživanja (“Službeni list RBiH”, br. 16/93 i 13/94) i
- g) Pravilnik o vođenju zbirke isprava i katastra istražnih prostora i eksploatacijskih polja (“Službeni list RBiH”, br. 16/93 i 13/94).

### Član 75.

#### (Usaglašavanje registracije privrednih društava i javnih ustanova)

Privredna društva ili javne ustanove registrirane za geološka istraživanja, projektovanja, izvođenje istraživanja i revizije projektne dokumentacije dužne su usaglasiti registraciju sa odredbama ovog zakona u roku od 12 mjeseci od dana stupanja na snagu ovog zakona.

### Član 76.

#### (Stupanje Zakona na snagu)

Ovaj Zakon stupa na snagu osmog dana od dana objavljivanja u “Službenom glasniku Unsko-sanskog kantona”.

Broj 01-02-1-219/11 20. oktobra 2011. godine B i h a ć	Predsjedavajući Skupštine Unsko-sanskog kantona mr. sci. Husein Rošić
--	---

## 616.

Na osnovu člana 2. g), poglavlja IV i člana 11. b) odjeljak A, poglavlja V Ustava Unsko-sanskog kantona – prečišćeni tekst (“Službeni glasnik Unsko-sanskog kantona”, broj: 1/04 i 11/04), na prijedlog Vlade Unsko-sanskog kantona, Skupština Unsko-sanskog kantona na 14. sjednici održanoj dana 20.10.2011.godine donijela je:

## ZAKON

### O POTICAJU RAZVOJA MALE PRIVREDE

#### I. OPĆE ODREDBE

### Član 1.

#### (Predmet Zakona)

Ovim Zakonom se uređuju osnove planiranja, osiguranje sredstava i provođenje mjera razvoja male privrede u Unsko-sanskom kantonu (u daljnjem tekstu: Kanton), aktivnosti i mjere Vlade Unsko-sanskog kantona (u daljnjem tekstu: Vlada) u poticanju razvoja male privrede, nadzor nad provedbom Zakona, kaznena i druga pitanja u vezi sa poticajem razvoja male privrede u Unsko-sanskom kantonu.

## II. SUBJEKTI MALE PRIVREDE

### Član 2.

#### (Definicija subjekata male privrede)

Malu privredu čine subjekti male privrede, fizička i pravna lica, koja trajno obavljaju zakonom dopuštene djelatnosti radi ostvarivanja dohotka odnosno dobiti, uključujući samozapošljavanje i porodične poslove povezane sa obrtom i drugim djelatnostima, registrovani kod nadležnog organa, bez obzira na oblik organizovanja i koji:

- a) su samostalni u poslovanju,
- b) zapošljavaju prosječno godišnje manje od 250 lica i
- c) ostvaruju godišnji prihod manji od 95.000.000,00 konvertibilnih maraka ili čiji je bilans stanja manji od 86.000.000,00 konvertibilnih maraka.

### Član 3.

#### (Samostalnost u poslovanju)

Samostalnost u poslovanju postoji:

- a) ako druga fizička ili pravna lica koja ne ispunjavaju uslove iz člana 2. ovog Zakona pojedinačno ili zajednički, nisu vlasnici kapitala ili ne učestvuju u pravu odlučivanja više od 25% u subjektu male privrede,
- b) ako je prekoračen udio od 25%, ukoliko udio u vlasništvu ili u pravu odlučivanja u subjektu male privrede ima investicijski fond ili javni sektor, pod uvjetom da njihov udio u kapitalu ili u pravu odlučivanja pojedinačno ili zajednički nije veći od 50% i
- c) ako raspored udjela u vlasništvu subjekta male privrede nije moguće utvrditi te se, na osnovu posebne izjave istog, može opravdano pretpostaviti da druga fizička ili pravna lica iz tačke a) i tačke b), ne prelaze ograničenja uslova samostalnosti u poslovanju subjekata male privrede iz istih tačaka ovog člana.

### Član 4.

#### (Podjela subjekata male privrede)

(1) Prema veličini, u smislu ovog Zakona, razlikuju se mikro, mali i srednji subjekti male privrede.

- a) Mikro subjekti male privrede su fizička i pravna lica koja zapošljavaju prosječno godišnje 9 i manje lica i čiji je ukupni godišnji prihod i/ili čiji je ukupni godišnji bilans stanja manji od 4.000.000,00 konvertibilnih maraka.
- b) Mali subjekti male privrede su fizička i pravna lica koja upošljavaju prosječno godišnje od 10

do 49 osoba i čiji je ukupni godišnji prihod i/ili čiji je ukupni godišnji bilans stanja manji od 20.000.000,00 konvertibilnih maraka i

- c) Srednji subjekti male privrede su fizička i pravna lica koja upošljavaju prosječno godišnje od 50 do 250 osoba, čiji je ukupni godišnji prihod manji od 95.000.000,00 konvertibilnih maraka i čiji je ukupni godišnji bilans stanja manji od 86.000.000,00 konvertibilnih maraka.

(2) U slučaju da, zbog sukoba kriterija broja zaposlenih sa finansijskim pokazateljima iz prethodnog stava, nije jasno u koju od postojećih kategorija spada fizičko ili pravno lice, odlučujući kriterij je broj zaposlenih u fizičkom ili pravnom licu.

### Član 5.

#### (Kriteriji za razvrstavanje subjekata male privrede)

(1) Podaci o broju prosječno godišnje zaposlenih i o finansijskim pokazateljima utvrđuju se na osnovu posljednjeg godišnjeg obračunskog perioda. Vrijednost finansijskih pokazatelja utvrđuje se isključujući indirektno poreze.

(2) U slučaju novoosnovanih subjekata male privrede koji nemaju usvojen periodični obračun ili završni račun, podaci potrebni za razvrstavanje u grupe određuje se na osnovu procjene nadležne statističke institucije sačinjene za odgovarajući protekli period u toku godine.

(3) Promjena grupe, ukoliko je prilikom zaključivanja obračunskog perioda u koju je prema veličini razvrstan subjekat male privrede, došlo do smanjenja ili prekoračenja broja zaposlenih iz grupa definisanih u članu 4. ovog Zakona, odnosno smanjenja ili prekoračenja finansijskih pokazatelja iz tog člana, to neće rezultirati promjenom statusa subjekta male privrede, osim ako se to smanjenje ili povećanje ne ponovi dva uzastopna obračunska perioda.

### Član 6.

#### (Broj zaposlenih)

(1) Broj prosječno godišnje zaposlenih određuje se na osnovu ostvarenih godišnjih sati osoblja sa punim i skraćenim radnim vremenom, osim vremena provedenog na porodijskom odsustvu i vremena provedenog u statusu pripravnika.

(2) Osoblje čine zaposlenici, privremeno angažovani radnici, vlasnici-menadžeri i angažovani radnici drugih preduzeća za vrijeme

provedeno na radu u redovnim aktivnostima subjekata male privrede, radi ostvarenja finansijske dobiti.

(3) Učenici, studenti i volonteri uključeni u stručnu obuku odgovarajućim ugovorom, ne smatraju se osobljem.

#### **Član 7.**

##### **(Vođenje statistike male privrede)**

(1) Subjekti male privrede se radi osiguranja statističkih podataka potrebnih za praćenje razvoja male privrede, razvrstavaju u kategorije prema broju zaposlenih kako slijedi:

- a) sa 1 zaposlenim licem,
- b) 2 do 9 zaposlenih lica,
- c) 10 do 49 zaposlenih lica i
- d) 50 do 249 zaposlenih lica.

(2) Razvoj male privrede se prati kroz promjene u poslovnom okruženju i kroz promjenu broja uposlenih i broja subjekata male privrede u pojedinim kategorijama iz ovog člana.

## **II. CILJEVI I PROGRAM RAZVOJA MALE PRIVREDE**

#### **Član 8.**

##### **(Ciljevi razvoja male privrede)**

Ciljevi razvoja male privrede su:

- a) povećanje zapošljavanja,
- b) povećanje izvoza i prilagođavanje svjetskom tržištu kroz ispunjavanje standarda Europske unije.
- c) povećanje proizvodnje, kvaliteta i konkurentnosti male privrede,
- d) promocija, istraživanje, razvoj i primjena savremenih tehnologija i inovacija,
- e) povećanje broja subjekata male privrede,
- f) poticanje djelatnosti koje ne zagađuju okolinu,
- g) poticanje obavljanja i opstanka tradicionalnih i starih zanata,
- h) povećanje udjela žena, mladih i osoba sa invaliditetom u poduzetništvu,
- i) održivi razvoj,
- j) razvoj poduzetničke infrastrukture i stvaranje boljeg poslovnog okruženja.

#### **Član 9.**

##### **(Program razvoja male privrede)**

(1) Okvir za programiranje razvoja male privrede su: Strategija razvoja malih i srednjih preduzeća BiH, Projekt "Razvoja malog i srednjeg

poduzetništva u Federaciji BiH", Evropska povelja za mala preduzeća, Strategija socio-ekonomskog razvoja USK-a, drugi propisi koji se shodno primjenjuju i odredbe ovog Zakona.

(2) Vlada Kantona, odnosno nadležno ministarstvo će u roku 12 mjeseci predložiti Skupštini Unsko-sanskog kantona Strategiju razvoja male privrede Unsko-sanskog kantona.

(3) Skupština Unsko-sanskog kantona na prijedlog Vlade usvaja Program razvoja male privrede Kantona a Vlada donosi jednogodišnji plan implementacije programa razvoja male privrede.

(4) Prilikom izrade prijedloga Programa razvoja konsultuju se nosioci provođenja Programa razvoja iz člana 16. ovog Zakona.

(5) Program razvoja za Kanton donosi se za period od četiri godine, a mogu se donijeti izmjene i dopune Programa, ako to zahtijevaju izmjenjene okolnosti u privredi.

#### **Član 10.**

##### **(Sadržaj Programa razvoja)**

Na osnovu definisanih ciljeva Program razvoja obavezno sadrži:

- a) pregled stanja i trendove u oblasti male privrede,
- b) projekciju željenog stanja na kraju perioda obuhvaćenog Programom razvoja,
- c) mjere razvoja male privrede,
- d) nosioce provođenja Programa razvoja,
- e) provedbene aktivnosti,
- f) visinu i izvore sredstava potrebnih za realizovanje Programa razvoja,
- g) rokove realizovanja mjera,
- h) indikatore uspješnosti i nadzor nad provođenjem pojedinih mjera.

#### **Član 11.**

##### **(Sredstva za provođenje Programa razvoja)**

(1) Finansijska sredstva za provođenje Programa razvoja putem Programa poticaja razvoja male privrede osiguravaju se u Budžetu Kantona za svaku Budžetsku godinu.

(2) Visina finansijskih sredstava iznosi do 2% vrijednosti godišnjeg Budžeta Kantona i proporcionalna je vrijednosti eventualnog rebalansa Budžeta. Osim navedenih sredstava iz stava (1) ovog člana, mogu se koristiti i druga raspoloživa sredstva čije korištenje nije zakonom zabranjeno.

(3) Izvještaj o utrošku finansijskih sredstava utrošenih prema Programu poticaja razvoja male privrede na prijedlog Ministarstva usvaja Vlada.

#### **Član 12.**

##### **(Program poticaja razvoja male privrede)**

(1) Program poticaja razvoja male privrede (u daljnjem tekstu: Program poticaja), na prijedlog Ministarstva, za svaku budžetsku godinu, donosi Vlada.

(2) Programom poticaja utvrđuju se prioriteti i kriteriji poticaja razvoja male privrede u skladu sa raspoloživim finansijskim sredstvima.

(3) Okvir za izradu Programa poticaja do donošenja Programa razvoja dat je u stavu (4) člana 9. i članu 13. ovog Zakona.

### **III. POTICAJNE MJERE**

#### **Član 13.**

##### **(Poticajne mjere)**

(1) Poticajne mjere i aktivnosti radi ostvarivanja ciljeva razvoja male privrede koje se utvrđuju Programom razvoja, odnose se na:

- a) kreditiranje subjekata male privrede pod povoljnim uslovima,
- b) učešće u finansiranju projekata na partnerskim osnovama a koji se odnose na razvoj male privrede,
- c) pružanje stručne i savjetodavne pomoći za subjekte male privrede, te organizovanje obrazovanja za poduzetnike,
- d) davanje podrške za povećanje zapošljavanja,
- e) davanje podrške za učestvovanje na međunarodnim sajmovima i specijalizovanim izložbama u zemlji i inostranstvu,
- f) podrška razvoju inkubatora, poduzetničkih centara, poslovnih zona, klastera i tehnoloških parkova,
- g) podrška razvoju poduzetništva ciljnih grupa (žensko poduzetništvo, poduzetništvo mladih, poduzetništvo invalidnih osoba),
- h) davanje podrške za istraživanje, razvoj i primjenu inovacija, uvođenje savremenih tehnologija, kao i uvođenje sertifikata i međunarodnih standarda kvalitete i
- i) davanje podrške zaštiti i revitalizaciji tradicionalnih i starih zanata (obrta).

(2) Programom razvoja se mogu utvrditi i druge poticajne mjere u skladu sa primjerima dobre prakse iz okruženja zavisno o djelatnosti, sjedištu ili veličini subjekata male privrede,

utvrđene prema odredbama člana 4. ovoga Zakona.

#### **Član 14.**

##### **(Pravilnik provođenja Programa poticaja)**

(1) Vlada Kantona će na prijedlog Ministarstva donijeti podzakonski akt – Pravilnik kojim se detaljnije uređuju postupci u provođenju Programa poticaja.

#### **Član 15.**

##### **(Prava i obaveze korisnika poticajnih sredstava)**

(1) Ministarstvo sa korisnicima poticajnih sredstava posebnim aktom (Ugovorom) uređuje međusobna prava i obaveze, a koji obavezno sadrži sljedeće: namjenu, visinu i uslove dodjele sredstava, rokove utroška sredstava, te način i rokove izvještavanja i pouku o pravnom lijeku.

(2) U slučaju kreditiranja subjekata male privrede pod povoljnim uslovima iz člana 13. stav (1) tačka a) ovog Zakona, plasman finansijskih sredstava se vrši putem banke koja zaključuje ugovore o dodjeli kredita s korisnicima kredita te vrši kontrolu namjenskog utroška kredita i osigurava povrat kreditnih sredstava.

(3) Korisnici sredstava su obavezni:

- a) dodjeljena sredstva koristiti namjenski u skladu sa posebnim aktom
- b) pridržavati se rokova o utrošku dodijeljenih sredstava utvrđenih posebnim aktom
- c) pridržavati se rokova izvještavanja o realizovanju preuzetih obaveza utvrđenih posebnim aktom.

### **IV. NOSIOCI PROGRAMA RAZVOJA**

#### **Član 16.**

##### **(Nosioci provođenja Programa razvoja )**

Nosioci provođenja Programa razvoja, u smislu ovog Zakona su:

- a) Vlada,
- b) Ministarstvo,
- c) Jedinice lokalne samouprave,
- d) Privredna komora kantona,
- e) Obrtnička komora kantona,
- f) JU Služba za zapošljavanje kantona,
- g) Udruženja poduzetnika i obrtnika,
- h) Drugi subjekti koji u okviru svoje nadležnosti potiču razvoj male privrede.

**Član 17.****(Obaveze na provođenju Programa razvoja)**

(1) Ministarstvo prati i analizira provođenje Programa razvoja i Programa poticaja, izvještava Vladu o istom i predlaže mjere za dalji rad i bolju efikasnost u realizaciji poticajnih mjera.

(2) Jedinice lokalne samouprave izrađuju vlastite programe i planove, pripremaju informaciono-dokumentacione podloge za pripremu Programa razvoja, predlažu razvojne projekte, prate, analiziraju i izvještavaju o provođenju projekata i poticajnih mjera iz svog djelokruga.

(3) Ostali nosioci Programa razvoja iz člana 16. ovog Zakona, predlažu poticajne mjere i razvojne projekte iz svoje nadležnosti, neposredno provode mjere za koje su zaduženi programom, te prate i izvještavaju o postignutim rezultatima.

**V. NADZOR****Član 18.****(Nadzor nad provođenjem Zakona)**

Nadzor nad provođenjem ovog Zakona i propisa donesenih na osnovu ovog Zakona vrši Ministarstvo, Ministarstvo finansija i Kantonalna uprava za inspeksijske poslove.

**Član 19.****(Nadzor nad utroškom dodijeljenih sredstava)**

(1) Ako se u postupku nadzora utvrdi da je došlo do povrede ovog Zakona, propisa, opštih akata i odredbi ugovora prema korisnicima sredstava poduzeti sljedeće:

- a) narediti otklanjanje nedostataka utvrđenih u postupku nadzora,
- b) narediti povrat vrijednosti sredstava dodijeljenih ili upotrijebljenih suprotno odredbama ovog Zakona, propisa donesenih za njegovo provođenje i odredbi potpisanog ugovora,
- c) obavijestiti nadležna tijela uprave o provođenju određenog postupka i tražiti provođenje postupaka ako Ministarstvo nije samo ovlašteno direktno postupati,
- d) podnijeti zahtjev za pokretanje prekršajnog postupka zbog povrede odredbi ovog Zakona i propisa donesenih na osnovu njega.

(2) Ministarstvo donosi rješenje kojim se korisniku naređuje povrat dijela ili cjelokupnog

iznosa dodijeljenih sredstava ako je došlo do povrede odredbi iz stava (1) tačka b) ovog člana.

(3) Protiv rješenja iz prethodnog stava nije dozvoljena žalba, ali se može pokrenuti upravni spor tužbom kod nadležnog suda.

**VI. KAZNENE ODREDBE****Član 20.**

(1) Novčanom kaznom u iznosu od 1.000,00 KM do 10.000,00 KM kaznit će se za prekršaj korisnik sredstava-pravno lice ako dodijeljena sredstva koristi suprotno odredbama člana 15. stav (3) tačka a) ovog Zakona.

(2) Novčanom kaznom u iznosu od 500,00 do 2.000,00 konvertibilnih maraka kaznit će se i odgovorno lice u pravnom licu za prekršaj iz stava (1) ovog člana.

(3) Za prekršaj iz stava (1) ovog člana kaznit će se fizičko lice-korisnik sredstava novčanom kaznom u iznosu od 500,00 do 1.500,00 konvertibilnih maraka.

**Član 21.**

(1) Novčanom kaznom u iznosu od 500,00 do 5.000,00 konvertibilnih maraka kazniće se za prekršaj korisnika sredstava-pravno lice, ako:

- a) ne utroši dodijeljena sredstva u roku utvrđenom na način propisan članom 15. stav (3) tačka b) ovog Zakona;
- b) ne izvjesti o realizovanju preuzetih obaveza u roku utvrđenom na način propisan članom 15. stav (3) tačka c) ovog Zakona.

(2) Novčanom kaznom u iznosu od 300,00 do 1.500,00 konvertibilnih maraka kazniće se i odgovorno lice u pravnom licu za prekršaj iz ovog člana.

(3) Za prekršaj iz stava (1) ovog člana kazniće se fizičko lice-korisnik sredstava novčanom kaznom u iznosu od 200,00 do 1.000,00 konvertibilnih maraka.

**Član 22.****(Pokretanje prekršajnog postupka)**

Zahtjev za pokretanje prekršajnog postupka podnosi Ministarstvo i Kantonalna Uprava za inspeksijske poslove.

**Član 23.**

Korisnik poticajnih sredstava kojem je pravosnažnom odlukom izrečena kazna za prekršaj iz članova 20. i 21. ovoga Zakona, ne može ostvariti pravo na poticajne mjere



